

麟書
楊帝海山記
楊太真外傳
竊憤錄
謝小娥傳

求心錄
煬帝開河記
高力士傳
南爐紀聞錄

中山狼傳
煬帝迷樓記
裴伯先別傳
御製紀夢



求

心

錄

撰人不詳

中華書局

求
心
錄

此 據 古 今 說 海 本
排 印 初 編 各 叢 書
僅 有 此 本

求心錄

乾元初。會稽民有楊叟者。家以資產豐贍。聞於郡中。一日叟將死。臥而呻吟。且僅數月。叟有子曰宗素。以孝行稱於里人。迨其父病。罄其產以求醫術。後得陳生者。究其脈曰。是翁之病。心也。蓋以財產既多。其心爲利所運。故心神已離去其身。非食生人心。不可以補之。而天下生人之心。焉可致邪。如是則非吾之所知也。宗素既聞之。以爲生心故莫可得之。獨修浮圖氏法。庶可以佑其疾。卽召僧轉經。命工圖鑄其像。已而自齋食詣郡中佛寺飯僧。一日因挈食去。誤入一山逕中。見山下有石龕。龕有胡僧。貌甚老。既枯瘠。衣褐毛縷成袈裟。露坐於磐石上。宗素以爲異人。卽禮而問曰。師何人也。獨處窮谷。以人跡不到之地爲家。又無侍者。不懼山野之獸。有害於師乎。不然。是得釋氏之術者邪。僧曰。吾本是袁氏某祖居巴山。其後子孫或在弋陽。散遊諸山谷中。盡能世修祖業。爲林泉逸士。極得吟嘯之趣。人有好爲詩者。多稱其善吟嘯。於是稍聞於天下。有孫氏亦族也。則多遊豪貴之門。亦以善談譚故。又以之遊於市肆間。每一戲。能使人獲其利焉。獨吾好浮圖氏。不悅塵俗。棲心巖谷中不動。而在此且有年矣。常慕育利王。割截身體。及委身投崖以飼餓虎。故吾啖橡栗。飲流泉。恨未有虎狼噬吾。吾固甘之也。宗素因告曰。師真至人。能舍其身而不顧。將以飼山獸。可謂義勇俱極矣。雖然。弟子父有疾已數月。進而不瘳。某夙夜憂迫。計無所出。有醫者云。是心之病也。非食生人之心。固不可得而愈矣。今師能棄身於豺虎以救其飢。豈若舍命於人以惠其

生乎。願師詳之。僧曰。誠如是。果吾之志也。檀越爲父而求吾。吾豈有不可之意。且吾以身委於野獸。曷若惠人之生乎。然今日尙未食。願致一飽而後死也。宗素且喜且謝。卽以所挈食。致於僧前。食之立盡。乃曰。吾旣食矣。當禮四方之聖。然後奉教也。於是整其衣。出龕而禮。禮東方已畢。忽躍而騰上一高樹。宗素以爲神通變化。殆不可測。俄召宗素。厲聲而問曰。檀越向者所求何也。宗素曰。願得生人心以療父疾。僧曰。檀越所願者。吾已許焉。今欲先設金剛經之奧義。且欲聞乎。宗素曰。某素向浮圖氏。今日獲遇吾師。安敢不聽乎。僧曰。金剛經云。過去心不可得。見在心不可得。未來心不可得。檀越若要取吾心。亦不可得矣。言已。忽跳躍大呼。化爲一猿而去。宗素驚異。惶駭而歸。